

鄭徵君遺著

捌

郑徽君遗著

函 一册

北京市中国书店印行

定价：七十五元

廬山謠

屈廬詩稿卷一

遵義 鄭知同 伯更

古今詩共七十五首

己酉說己巳

大暑行

金盤湧上扶桑杪天雞忽唱雲中曉我欲驂鸞復御龍
空中衣袂天風繞騰虛蕩蕩入天門力拒黃人轉蒼昊
鼓刀奮迅殺蒼鷺一快炎蒸盡揮掃卻念天人隔渺茫
天公威令誰能矯不能避暑廣寒宮流金炎景催人老
紙屏石枕視良朋石鼎甌鑪誠至寶黑甜鄉好祇益倦
蜜汁茶甘愈增懊琥珀冰盤不納涼蒲葵大扇空煩擾

汗流如雨不能揮日夜驅蚊復捕蚤披襟向陰陰亦炎
赤腳覓泉泉已少土囊杜口不生風白日不動蒼天小
安得驪龍頷下珠重淵酣睡當胸抱銀漢無波誰復知
咸池水涸應難保蟠桃何日更開花若木難禁枯復槁
卻羨六龍不畏曬回車宛轉奔黃道何當青海起伏龍
掀駕雷公頃刻到快哉風雨拂鬱攸無令旱魃久相絞

己酉歲九月九日追和靖節先生原韻

有節患無菊有菊患寡交花開客亦滿無酒興復凋三
者此全具足以壯登高今載靖節載餘滓仍澄霄歷久
復有今可辭終日勞壺傾百杯醖麥熟兩甕焦黃昏醉

飽後得句何陶陶雖無南村詩亦足樂今朝

於堰南穫早稻

濁富不足貴清貧亦殊難終年勉嗇事不足供饑寒新
穀未登場斗儲先已單堰南一畦稻所資繼朝餐歲計
喜先熟庶無變一簞晨興度阡陌父老慶有年吁嗟誠
有年手足胼後胼不見樹藝同飢飽存其間衣食信如
此人功能奪天吾儕自耕食況乃性分然誰不事經營
而能求自安

編籬

疎籬短短對南山小圃秋深日往還野趣回環三徑老

西風收拾一園關，幾聲落葉敲霜冷。盡夜鳴蜩弔菊寒，載酒三更歸未得。露深猶自繞苔斑。

秋陰

層陰迢遞接空濛，無限秋懷倚碧桐。蕭瑟山川猿嘯裏，蒼茫物色雁聲中。平原木脫雲無影，曠野天低水偪空。試上松崖舒遠眺，淡煙衰柳正西風。

金然

并序

釜底常有墨，厚分許煙所成也。積久觸微火，乃然。暴火則否，俗以兆晴居校官久雨，偶於爨後見之，已而果晴。

山城苦雨浹旬日生柴積煙金生墨晨炊餘火觸臍然
初如幾點疥癬跡金蛇盤互逐節伸火輪宛轉趨風急
中間一塔尙昏黑白蜩成陣爭行出滿天星宿散囊螢
布地黃金走沙磧縱橫散漫奇罕匹過眼罪罪隨變滅
勢盡延緣作絞綯春蚓穿沙肆紆屈明朝餘渣盡澄霄
物理感通誰盡悉到官十日只望晴笑指乾鍋勝龜圻
遊石碧崖登最上亭

在鎮遠府治對岸

巖上撐孤亭亭上懸蒼巖敲瘦柏作檻縷絡藤爲簾怪
石如蟠蚪鱗鬣森巉巉仰視何玲瓏縹透誰鐫鑿飛甍
壓晴波笑兀空際黏我來緣髮徑曲折隨留淹上上恣

窮攬青壁前忽覘攀扶倚楹柱恍立秋毫尖喘息定驚
魂放膽舒眺瞻雪霽天宇明山水相澄涵城郭接原野
一碧低橫嵐石屏獨巍聳迥秀淩空添灕水齧崖足湍
瀨停爲潭鷗鵲曬圓沙漁子歌半酣奔流劃崖去拍浪
拋輕帆風掀一闋聲忽若潮來滄市塵來去人行螳相
聯銜營馬散平林戢戢食葉蠶勝景此超絕餘觀俱退
謙暝色催返棹戀戀情未厭胷次數月塵快洗泥一杓

月夜

獨步林塘下纖雲四捲空松多還受月柳瘦不牽風人
意清如許天光澹與同夜深歸未得霜氣下樓東

晚步

雨後輕泥溼行吟出米溪日分峰向背竹暝水東西任
意移芳躅隨風返故蹊閒農無一事三五話寒畦

山中梅開

冬日過將半梅梢未點妝纔經一夜雪開得半橫塘流
水春無迹空山月暗香墓門應自此花事漸添長

梅花絕句四首

安排竹屋看橫斜底事纔生幾點花莫是昭君魂未返
珮環月下滯胡沙

嶺上冰魂無斷絕纔從雪後弄幽光天寒翠袖捲日暮

一笑巡檐點淡妝

一杯酈綠伴黃昏妙意凝神不可言踏遍羅浮深夜雪
一叢花下一詩人

風雪精神正此時不知百卉竟何之逐春能得幾時好
桃李而今知未知

夜讀

萬籟宵分寂貪書引興長齋心醫鈍藥宿讀饋貧糧熨
眼鐙懸蟹神昏芋作羊雕蟲何足貴學海望汪洋

竹下偶成

石上有小亭亭北有紫竹稀疏十數竿映帶一庭綠柿

葉久無陰桑枝復已禿冬日小亭上賴此寫心曲密葉
亂無數秀色濃可掬蕭灑動微風徒倚託芳躅時時彈
素琴因之酌鄙綠緬懷嵇阮徒長嘯振崖谷景物但適
性容膝詎爲促

晚眺前林

山山收暝色嵐翠壓松筠返牧兒童樂歸巢鳥雀馴雪
殘疑有鶴樹遠望如人清景應須畫誰堪與細論

如達小女次義山衮師詩韻

正朔生絳老初度已寡匹重瞳肇膺圖機衡齊政七良
時適及子寢地曉寒栗喜見一代孫汝乃首出物廬墓

遷居來添丁纔第一得數並得先詎不稱貴骨煦嫗未
周睟威怒成健質慈母飯逃子少姑眠倦姪反側不着
懷那顧漲乳溢貪華朝暮啼風雨或難出園林日抱翔
生摘丐果實非親挽不去屹立等圭笏阿翁挈鄴綠噉
喁便欲吃倒身向阿婆驕氣倍佶傈扱衽着短後學步
恣衝突爭逐羣幼隊昂藏似鷹鵠牙牙初作語入聽得
仿佛向人索弄物甘言已如蜜稍長益明儘姿度無可
疾兩臂光若藕冰玉色俱失兩足白勝雪不喜着背戍
齒清紈素比面粲蕙芳律長眉同掃妝青眸類點漆家
人喜穎秀旦晝轉加勝乃祖特鍾愛物物任其乞曲意

揣所歡百計度一日聰明遂速啟情態不可筆汝姑生
昔年家窘尙傳述炊麥雜飛蠱舂麻撮狗蝨飴弄得溪
魚供餐不去乙黃雞絕產卯冬日便無術貧賤養兒女
艱苦難記悉汝今需百味任意了無悖葷腥每佐飯祇
慮厚釀疾似此當速成勿使眼穿穴中郎誠有女應付
青箱帙

觀舞猴

禽獸亂人羣薄習何代垂世顧樂異物不復思其宜我
觀睢盱態有技將何施正以醜見巧俳優娛眾兒旣着
項羽冠更衣周公衣假面戲侏儒烏龍從指麾居然袁

公術木兵臨陣奇忽作猴夫人妖豔扶婁姿頃復着緋袍供奉端容儀太息楊于度矯輓物性離野賓曾記否山中吟嘯時幾日落機網虛幻從人爲但恐面目改眾狙驚見疑

懷趙二珊

廷璜姊婿

分襟何草草別後思已遲平居少交際獨子爲相知踰歲始集郡瞥復傷別離勿謂前期易少壯能幾時木落空山寒鎮日無言辭嗟余寡兄弟手足長如遺心交更久濶難勝寥寂思預計元日後珠鐙紅萬枝景貺斯時來倡和吟春思蘇子雖畏酒尙非坐窮詩君醉我解詠

囊盡還謀妻

山中卽事

冬餘成就石林蟠更向新池起小巒地僻獨嫌春到緩
居深未覺雪侵寒薤桑先便明年摘種竹纔添一處看
眼底盤中俱自適一吟一度倚闌干

晚飯

杜老子魚嗟莫辨髻翁蘆菰得非難冒嫌晶飯常供飽
可想貧家尙絕餐陶令飢驅憐更乞庾郎貧慣卻能安
蒸豚人乳教神泣何似齏鹽得自完

月夜

倦坐褰帷出微颺拂面輕泉穿幽徑咽月躡薄雲行妙境誰曾覺長空似箇清瓊樓高極處果否有寒生

次夜月

風動戰菰蒲清光滿一湖雲輕機散錦星落浦還珠夜靜收羣動天空有一吾鼾聲方飽臥輸爾惡羝奴

晚歸

水輪聲涸霜氣高磊落石出魚歸濠行人晚度喬木底潭古陰陰生豎毛草樹谿頭出岑寂誰家犬吠東林梢微漸瀲灩送歸路孤煙斷續瞻衡茅山中小弟聞與杖屨短且令勤焚膏